

Geen herinneringe aan vorige lewens nie. Oor die samehang van liggaam, siel en gees

214 Philopold lees die rolle baie aandagtig deur en omdat daardeur sy innerlike oog geopen word, sê hy na `n behoorlike tyd van uiterste verbasing: “Ja, so is dit; ek kyk nou terug in die totale eindelose diepte van my lewe, ek sien al die wêrelde waarop ek reeds geleef het en al die plekke en stede in die wêrelde waar ek vanaf geboorte tot aan my afskeid geleef het; ek sien wat ek was en wat ek op die hemelliggame gedoen het, en ek sien ook oral die nakomelinge van my naaste verwante, en kyk hier, op Akka sien ek selfs nog my ouers, my baie broers en baie dierbare susters! Ja, ek hoor hulle selfs onder mekaar besorg oor my praat en sê: “Hoe sou dit met Murahel gaan? Sal sy gees al in die eindelose ruimte die groot Gees in mense-gedaante gevind het? Hy sal nie aan ons dink nie, omdat ArgiEl, die afgesant van die groot Gees, sy geheue afgeskerm het tot op die oomblik waarop hy hom driemaal op sy regte naam sal roep!

[2] Kyk tog! So hoor ek hulle nou praat en ek sien hulle tewens in lewende lywe! Hulle gaan nou na die tempel om die sware lewensvoorwaardes in die dokumente na te lees, maar hulle vind dit nie. Die hoëpriester van die tempel sê egter aan hulle dat ArgiEl enkele oomblikke gelede die dokumente ten behoeve van Murahel kom haal het, maar dat hy dit direk terug sal bring. En hulle wag nou in die tempel en offer vir my!

[3] O Liefde, Liefde, o goddelike krag! Hoe eindeloos ver strek U U aparte arms uit! Oral dieselfde Liefde! O Elohim, hoe groot en heilig is U en hoe is die vrye lewe tog vol van verborge geheimenisse! Watter mens op die hele aarde kan die diepte deurgrond wat ek nou sien? Hoe totaal niksseggend is die armsalige mens op die maer aarde besig, vegtend nie selde nie om lewe en dood vir `n handbreedte grond, terwyl hy dit in homself dra wat miljarde aardes nooit kan bevat nie!”

[4] Na hierdie woorde word **Philopold** stil, gaan na die engel en gee hom die twee rolle weer terug met die opmerking: “Bring hulle weer terug na waar op hulle gewag word!”

[5] Maar **die engel** sê: “Kyk, ek het ook `n skryfgriffel saamgebring; dit is dieselfde een waarmee jy eie-handig in die tempel op Akka die dokumente onderteken het. Skryf op elke dokument tweemaal jou naam, dit wil sê, die naam wat jy op Akka gehad het sowel as die naam wat jy hier het, en hou die skryfgriffel as herinnering!”

[6] Philopold doen dit, en die engel neem daarna die dokumente en verdwyn.

[7] Na enkele oomblikke, wat hy nodig het vir `n bespreking met die hoëpriester op Akka, is hy weer by ons en vra aan Philopold wat hy nou dink.

[8] Daarop sê **Philopold**: “Nadat ek aan jou altwee rolle teruggegee het, verdwyn my visioen, en wat ek my daarvan kan herinner is kwalik meer as soos met `n droom waarvan mens in jou wakker toestand kan onthou dat jy iets gedroom het, maar wat jy jousef, ondanks al die pogings nie meer kan herinner nie! Ek merk ook dat ek `n baie vreemdsoortige skryf-werktuig in my linkerhand hou; maar hoedat ek daaraan gekom het, weet ek skaars; en daarom sou ek graag wil weet waarom mens tog van so baie verskynsels binne die bestek van die innerlike lewe slegs maar `n baie swak, of meestal heeltemal geen, herinnering het nie. Waarom is dit so?”

[9] **Die engel** sê: “Omdat dit hier daarom gaan om `n algeheel nuwe skepsel te word, en wel uit en in Elohim. As jy eenmaal uit Elohim `n algeheel nuwe skepsel is en die kindskap van Elohim bereik het, dan sal alles weer aan jou teruggegee word!

[10] In die tallose ander wêrelde word jy innerlik en uiterlik gevorm tot die persoon wat jy moet wees; maar hiër laat Elohim die uiterlike vormgewing oor aan die siel, wat haar liggaam self vorm volgens die ordening waarin sy geskape is; maar elke gees wat in die siel geplaas is, moet eers die siel vorm deur die navolging van die, hom van buite-af gegewe, wette. As die siel daardeur die nodige ryphed en vorming bereik het, dan gaan die gees volledig in die siel oor en dan is die hele mens daardeur voltooi, `n nuwe skepsel, in beginsel weliswaar altyd uit Elohim, omdat die gees in die mens eintlik niks anders is as `n God in die kleinie nie, omdat dit volledig uit die hart van God/Elohim kom. Maar die mens bereik dit nie deur `n daad van Elohim nie, maar deur sy eie persoonlike optrede, en word juis daardeur `n waaragtige kind van Elohim! En ek sê vir jou nog `n keer baie kortliks:

[11] Op al die ander hemelliggame moet die mense hulleself nie self vorm nie, maar word hulle deur Elohim, of wat dieselfde is, deur Sy kinders gevorm. Hiër moet die mense hulleself egter geheel-en-al self vorm volgens die geopenbaarde ordening, anders kan hulle onmoontlik kinders van Elohim word! En so is `n voltooide mens op die aarde as `n kind van Elohim in alles aan Elohim gelyk; maar `n nie-voltooide mens staan daarenteen veel laer as die diereryk!

215

Dan stel **Philopold** nog `n vraag aan die engel: "Maar wie toon ons die geheime ordening?"

[2] **Die engel** sê: "Die Persoon wat jou so-ewe na my verwys het! Gaan na Hom; Hy sal aan jou sê wat Hy jou reeds gesê het; want as jy leef soos wat Hy sê dat jy moet lewe, dan is dit dié goddelike lewensorde, waarsonder mens die kindskap van Elohim nie kan bereik nie!

[3] En Hy is ook Die Persoon waarvoor jy en nog baie ander Akka geestelik verlaat het en op hierdie aarde in die vlees van die aarde gebore is om die Meester te leer ken.

[4] In die hele skepping is egter - en wel op al die hemelliggame wat, hoe ookal, deur denkende wesens in menslike gedaante bewoon word, die volkome menswording van die Meester in die vlees deur ons bekend gemaak; maar slegs op `n baie geringe aantal wêrelde **is dit aan baie weinig geeste toegestaan om in die vlees na die aarde te kom**. Want die Meester ken elke natuur van al die wêrelde in die eindelose ruimte, en dus ook die aard en die moontlikhede van die bewoners en hulle geeste wat die verskillende wêrelde bewoon, en daarom weet Hy die beste of `n gees geskik is vir die vlees van die aarde of nie.

[5] Al diegene wat geskik was, is ook hierheen gebring; maar die aantal van diegene wat hierheen gebring was, is maar klein en kom nie noemenswaardig bo die tienduizend uit nie.

[6] Maar onder diegene is jy een van die gelukkigste; want as jy so wil, kan jy, net soos al diegene wat saam met die Meester hierheen gekom het, as leerling deur Hom aangeneem word."

[7] Daarop sê **Philopold**: "My ArgiE! Omdat jy vir my al soveel wonderbare dinge gedoen het, doen dan nog één ding vir my en bring my na die Meester; want noudat ek Hom herken het, ontbreek dit my aan die moed om opnuut na Hom toe te gaan! As Hy

nou vir my lag, sou ek liefs so gou moontlik vandaar weggaan en my sodanig verberg dat geen mens my ooit sal vind nie! Maar omdat ek nou eenmaal hier is en almal my goed ken, kan ek dit nie doen nie; want dan sou die hele dal vol wees van die lag vir my. Wees daarom so goed en bring my na die Meester en wees daar my voorspraak!"

[8] **Die engel** sê: "Dit hoef ek nie te doen nie, want die Meester weet wat vir ons beide nodig is; gaan jy dus maar gerus alleen en Hy sal jou sekerlik nie middeldeer splyt nie."

[9] Na hierdie antwoord van die engel skep **Philopold** eindelijk moed en gaan baie bedagsaam na My toe en sê, terwyl hy nog dertig treë van My af staan: "Meester, laat U my toe dat ek nader kom? As U dit nie wil nie, dan gaan ek weer terug!"

[10] Maar **Ek** sê: "Wie wil, die kan kom; want deur te aarsel het geen mens nog ooit verder gekom nie!"

[11] Toe Philopold dit hoor, loop hy ietwat vinniger en is dan ook al gou-gou by My, en het op hierdie wyse dit bereik, waarvoor baie ander net so aarsel en daarom ook dikwels nie bereik nie, **omdat hulle ondanks al die aanmoedigings nie vanaf hulle staanplek te beweeg is nie**.

[12] "Want as iemand by al sy doen en late sy skrede nie **in `n reguit lyn op My rig nie**, is al sy doen, gaan en staan nutteloos vir sy lewe. En ook al verkry hy die hele wêreld, maar hy het My nie, dan het hy aan die hele wêreld niks nie; want dié is dood! Maar as Ek nou in hierdie tyd van die onthulling van die evangelie iemand roep en aan hom sê: "Kom!" - en hy kom nie, dan is sy gees gedoem om te sterf! **En daarom is Philopold `n goeie voorbeeld wat almal moet navolg!** Wie geroep word nadat hy na My gevra het, daardie een moet kom en nie aarsel nie! Want Ek bly nie altyd in Kana (oftewel: vol barmhartigheid in die wêreld) nie, maar trek al gou verder en wend My oog en oor af van **diegene af wat aarsel as Ek "Kom!" geroep het!**"